

## ÖPFELBOUM U PALME

sisch no nid lang  
woni usem fänster ds meer  
u d' brandig ha gseh  
sisch no nid lang  
sit i ha begriffe  
was freiheit cha sy  
nei no nid lang  
ha chum chönne gloube  
wie ds läbe mi erfüllt  
we zyt ke rolle spilt

sisch no nid lang  
woni ha verstande  
was viel scho lang hei gwüsst  
nei no nid lang  
dasi öppis ha gfunde  
wo mi für immer het berüehrt  
u mi sit denn dür ds läbe füehrt

**drum stelli mir palme uf ds dach  
blibe bis spät am abe wach  
u ghöre ds rusche vo de wälle usem öpfelboum  
i loufe barfuess där d' gass  
u zeichne e charte i mi pass  
u i weis sisch ganz egal wo i grad bi  
die ganzi wält wartet uf mi**

sisch no nid lang  
ha so viel chönne lehre  
vo lüt wo nüt hei gha  
sisch no nid lang  
sit i ha erfahre  
wime a wenig freud cha ha  
nei no nid lang  
woni ha verstande  
das si mir dermit hei gseit  
der schlüssel ligt ir eifachheit